

NAMIBIA SENIOR SECONDARY CERTIFICATE

FIRST LANGUAGE THIMBUKUSHU ORDINARY LEVEL 4112/1

PAPER 1 Reading and Directed Writing

2 hours 30 minutes

Marks 70

2018

Additional Material: Answer Book

INSTRUCTIONS AND INFORMATION TO CANDIDATES

- Write your answers in the Answer Book provided.
- Write your Centre Number, Candidate Number and Name in the spaces on the Answer Book.
- Write in dark blue or black pen.
- Do not use correction fluid.
- Answer **all** questions.
- Pay attention to spelling, punctuation and sentence structure.
- The number of marks is given in brackets [] at the end of each question or part question

MARAWERO NOMAPATHWERERO KWAMUHATI KUMAKONAKONO

- Tjange mahuthero ghoye muMbapira dhoKuhuthera edhi hana tapa.
- Tjange Nomora dhoDyango, Nomora dhaMuhati Kumakonakono noDina paMbapira dhoKuhuthera.
- Tjange nokatjangitho kothinadiwiru ngambi kokeru.
- Wa rughanitha thidhingununitho thomeyu-meyu.
- Huthe mepwero **ghomaheya**.
- Kuthotera kumashashero, yitoyadimukitho nomarongathaneno ghoyighamba.
- Mapenda gha pwa kutura mutuhaki [] kughuhura gho kehe dipwero ngambi mutara ghodipwero.

This document consists of **6** printed pages and **2** blank pages.



Republic of Namibia

MINISTRY OF EDUCATION, ARTS AND CULTURE

MUTARA A

Toye thitoyamingwa thino kwishi, no ka huthe mepwero agha sho gha ka rande ko.

Thitoyamingwa 1

Mupepi ghomufughuri ghomuAfrica Ghucuma

Manongwahu agha ha mu reta nagho Natalie du Toit kutunda kuwanuke wendi, gha mu ningithire gha kare noyirota yo ka kuhatithera mumutangu ghoOlympics. Fumwa dhendi noghundwakadhi mumutangu ghoOlympics wa tangire mumwaka wa1998 apa gha ka karere po ditunga dyaAfrika Ghucuma muyipepa eyi ha turithire po hakaCommonwealth, oku aye gha di nomyaka dikumi no-dhine (14) ngenyu.

Munyima dhomyaka dhihatu, yirota yaNatalie ya na rumbwangere apa gha wanine dihudhi edi dya ningithire dighuru dyendi ha di tetere mudinwi. Dihudhi di mbadi dya dhongerire dighano dyendi. Ngambi kenge eshi ghana gharama paghudidi wendi muthipangero, mbuyama yu gho kutwetha kuyogha, ghomyaka dikumi nokwoko nodhiwadi (17) gha shwenine kuthigha dighano dyoyirota yendi.

“Hakuru wange nawayendhange hamweya kehe pano wo kunitongwera eshi nga ni kundhendhanga kumitambo dhoghudidi wange mu kukudeghura, yoyishi mayuwa ghoyipepa yoOlympics gha kokerire,” ha vuruka. Yighayadhara yishamango yo kumuteta dighuru eyi ya yipithire mupepo wendi gha shwenine kuyitawedhera yi mu dhongerithe kudighano dyendi. “Shime ha ni vuruka edi gho kuyogha, ene ya ni kukuterere pakupiruka no kuyogha dighuru dyofotji,” ha vuruka. “Na tangire kukudeghura mumufunda gho kuyogha pofotji nawanuke hamweya. Shime ha ni vuruka, pakutanga yame mwanuke nga ni myaghedhanga mukatji kawakurughana, ene pashañanyi ne yame mukurughana na kuyongaritha mukatji kwanuke, yoya ni ningithire ni kumbambangere thikuma kudyango dyo kuyeyuka ko ni kare shime muyoghishokuru. Dyo na tendire.” Munyima dho kukara tughonda tongandji muyikudeghura ghana hukere karo mumutangu. Mutangu ghu ghana ghu ghoyire omu ghana karire padyango dyodikumi no-kwokofotji (16) mwawahaterimo ho kukuma kumakumi mawadi no-hane (24), mumutangu gho kuyogha ghothinema thomameteri gho kukuma ku10 000. Ha thighuka kuAfrica Ghucuma nothindhivi thomayongarithero yipepa yendi.

Mu2002 ghana yendire no ha mu tawedhere mu ka kuhatithera mumutangu ghokuhurerera oghu ha turithire po hakaCommonwealth ghothinema tho kukuma kumameteri 800. Eyi ya karire eshi rorokutangerera muyithimwetwedha gha hatere murema mumutangu ghokuhurera gho kuyogha, ghokaye kokaheya pofotji nawahaterimo hohawawa. Kughuhura ghoyipepa gho hana mu pire ghushwi ghokutanga ghodina David Dixon yoyishi gha karire yomupepi ghokamanakandongo.

Mumwaka wa2004 munyima ngenyu dhomyaka dhitatu dhodihudhi dyendi, ghana myaghedhire midariyo kwoko dhongorondo muyipepa yomutangu wawayirema muditunga dyaGreece. Paghuhura ghana nongonine thitambo thendi thokundagha-ndagha mu2008 muBeijing apa gha retire thitetu muyithimwetwedha yokaye mu kuna kara mummyaghedhi ghodyango dyokutanga mumutangu ghoOlympics pofotji nawahaterimo hohawawa. “Mu kukutawedhera mumutangu waOlympics kwa karanga ruvedhe rorokuru ro kukona kunotora mahodhi, yoyishi yira kuna kudhina kudirundu dishare mukaye dyaEverest.”

“Eyino ya yuvekire yira ghuhura ghokaye,” ha wedherera ko.

Yitombora yo kukukarera yopapendi thinda ya retedhere Natalie du Toit gha kare ghufughuri kwawanu hohengi muAfrika Ghucuma nopanunda dhoditunga. Mukatji kawanu hokutangerera awa hana nongonine fumwa dhendi kwa karire Presidendi ghokutangerera waAfrika Ghucuma Nelson Mandela namurandi wendi Thabo Mbeki oyu ghana mu tanaghurire Natalie mughufughuri wendi panaro dhoditunga. Muyoghishokuru yu ghumyaghedhi wendi hana ghu nongononine pathirika tho kutapera ghushwi ghodina Laureus, apa ghana tundithire po makuthigho pakatji kawayirema nohahaterimo hohawawa muyipepa.

Panako dhodho du Toit gha rongathanine mu ka hatera mumutangu kuLondon mumwaka wa2012 omu ghana kughamba eshi aye kuna ka pepa rokhurerera mukaye kokahe. Ngambi kenge ghana kuroghithera ka shagheka, mbadi ghana huritha matoyedhero ghendi. Aye kuna kunonga mu ka wana matawedhero no ghana shana ka myaghedha yikandho yoyihe kwoko no-yiwadi mumutangu wawayirema mbo gha ka yokoke mo noyishamberera nomakukughero. Ngeshi mbadi ghana kukudeghura, Natalie gha haka kurughanitha ruvedhe rwendi muProyeka ghomakuhongo no kukuhathithera mumakurando gho kutepura mahudhi ghokurowera mumukunda wawakakunyanda muAfrika Ghucuma.

“Na nongonona eshi mudyo mu kukuyarekera maghano ne thothimwe ethi mbo ni karerera natho muyipara yange yoyihe mu kumona hamuregheya hana kuyogha, oku hakakuwadeghura pakukondja kuwahonga edi gho kuyogha,” gha ghambe du Toit. Oyo ne yoyomudyo po, kutapathana mbudhi no kudhirundurura ghu dhi rughanitha kehe diyuwa.

Eyi ya twarerekedhire Natalie gha ka kare mummyaghedhi shokuru wawayirema muditunga dyaAfrika Ghucuma muruvedhe roruheya no ghana kara munu ghomudyo muyithimwetwedha yoyipepa.

(© Cook, M. J.)

- 1 Huthe dipwero **1 (a)** kate **(c)** mu kutjanga ngenyu thitjanga thoghuhunga kudihuthero dyoye, yira: **(a) C**.
- (a)** Pakutangerera mbadi ya monekire eshi Natalie nanyi mbo yi kume mo yirota yendi yokuOlympics yoyishi ...
- A** gha karire noghurema ghoghukuru.
 - B** gha kuruparire thikuma.
 - C** mbadi gha kudeghurire thikuma.
 - D** mbadi gha wanine maghamweno kwawapendi. [1]
- (b)** Pashanye wa karere mwaka wa2008 mudyo kwaNatalie?
- A** Gha kumine kumutangu ghokuhurerera wawayirema.
 - B** Gha myaghedhire midariyo kwoko mumutangu ghokaye kokahe.
 - C** Gha ka haterire mumutangu waOlympics ghohahaterimo hohawawa.
 - D** Gha ka haterire kumutangu ghoyipepa yoCommonwealth. [1]
- (c)** Yikondjera yaNatalie yo kupakere pofotji yipepa ha yi nongononine apa
- A** ha mu raghire gha ka dhingure Presidendi ghoditunga.
 - B** ha mu pire ghushwi paveta.
 - C** ha mu pire thirughana tho kuyenditha proyeka ghoditunga.
 - D** ha mu pire yirughana mughuhurumende. [1]

- (d) Nye yina kutongora “kuyokoka mo noyishamberera nomakukughero” muthithimwedha thi? Toyey ko yinu **yiwadi**. [2]
- (e) Pashanye ghana kuyedhekeritherera Natalie kuhatera kuOlympics no kudhina dirundu dyaEverest? [1]
- (f) Nongonone no kuthothonona yighamba yiwadi eyi ghana rughanitha mutjangi mukutanaritha yihima yaNatalie mu kukakuma mughuta wakora? [4]
- [10]

2 Owe wa kara namushere ghoye oyu gha kara noghundondoro muyipepa yongandji, ene pamurandu ghomakurimbo ghongandji kuna kughayara ye kushagheka yipepa yi. Rughanithe maghano agha gha di muthithimwetwedha thaNatalie no tjange mbapira kwamushere ghoye mu kumutjokedha kutwara kughutho noyipepa yendi.

Yitjanga yoye yi kume kughure ghomañando **200 – 250**. [20]

MUTARA B

Toye thitoyamingwa thino kwishi no ka huthe mepwero agha sho gha ka rande ko.

Thitoyamingwa 2

Thipungushamuna

Wilma Rudolph kutunda 1940 kate 1994 gha pwire kudimuka eshi yo kamanakandongo mumushupu wawambuyama muayenda kaye. Aye karo yo mbuyama gho kutangerera ghomukaAmerika oyugha myaghedhire midariyo dhihatu dhongorondo mumushupu mumutangu wa Olympics mu 1960. Oghu ghomwaka karo ghokutangerera mutangu ghu wa Olympics ha ghu neghedhire pa TV kaye kokahe, eyi ya ningithire Wilma gha kare ndwakadhi. Mumwaka 1960, mu Olympics ghomu Roma gha fumutukire no kuyuka eshi, yo “Thipungushamuna.”

Wilma kwa mu pire fumwa dhoghundwakadhi apa ghana kuhatitherire makutureromo ghawambuyama mukuwina mushupu wawambuyama muditunga dya Amerika. Mbuyama yu gha yukire karo eshi yo ghumwe oyu gha kutupire mukunomena makutjindjero ghoghuparo no karo yomutoti kukondjera ghunu wamunu nomaghuwa ghawambuyama. Kutunderera kughumbiru wendi, Wilma gha pitire mumaghukukutu ghokukutjaka-tjaka. Wilma gha pwire kushamuruka notughonda to kupira kukumenena mo. Mwanuke yu nanyina ghodina Blance ha wa shwenine mukuwatambura muthipangero pamurandu ghomakutondovoro ghopamarudhi, thiku dhiya. Hakadiko ya wa kangire kuruwerera mwanuke yu nokwadokotere (nganga) ghomwiru temba, eyi ya wa ningithire keho hakadiko nanyina ha kupakerere ha rere no kupakera thinga ghundjewa-ndjewa wamwanuke yu. Muwanuke wendi, Wilma gha karire no ghuredhu gho kukavura kehe yino yikorwa yira: kakutji, mundha, rukuru, kughenya yirama kate kumoneka yimburu, yikorwa yobokishi nokapunga komeyu. Wilma naye oku myaka dhendi dhine (4) ya mu wanine yikorwa yomukongo. Nyambi wendi gha nerukire kukambumburu ka komukongo ene shime nga shupatanga thikuvo tho kukwata dighuru dyendi dyorumoho podigho eshi gha kone kuyenda.

“Dokotere wange gha ni hupurithire eshi mbo ni kufere ko kuyenda karo. Nawe gha ni kuruperithire eshi mbo na yendi. Na tawire yanawe.”

Wilma gha karire nodiko dyothinga nothihemo, nyina nga mu twaranga kehe pano kuthipangero ghure ghothinema makilometa makumi kwoko (50) ruwadi muthivike, ghure ghomyaka dhiwadi, kate ghana konine kuyenda thinda gha hana thikuvo thokuyenditha. Dokotere ghana nangwerire Blance yikudeghura yimwe yo kukona kughamwena Wilma.

Paguhura oku Wilma gha di nomyaka dikumi-nomyaka dhiwadi (12) ghana karire nongcamu dho kukona kuyenda thinda gha hana maghamweno ghoghukanguki gho kutunderera kumakwatithithoko ghothipangero kehe ghano. Gha kundwerire yoghurema wendi kumbadi no kutura yirota yendi yomushupu paghutho kate ya kumine mughuta wakora. Gha konine kukuhatithera muyipepa yopari ghokuyanya (basket ball) apa gha karire pashure no gha pwire kunongonono kughudimuki wendi ghomushupu kwamudeghuri ghoyipepa yi.

Apa ngenyu gha karire nomyaka dikumi-nokwoko-noghofotji, (16) munyima dhomyaka dhine (4) edhi dha pitire po kutunda apa gherukire kughurema ghomukongo, Wilma gha karire ghumwe muyipepa yomushupu (kutjira noyomwishi) eyi ya hokokerire mu Olympics ghomu Amerika mu 1956 no gha wanine mudariyo ghobronze, mudyango dyoghuhatu.

Mumushupu ghomuOlympics ghomu1960, Wilma gha myaghedhire karo no kukara ndwakadhi mukaye oyu gha yukire eshi yombuyama gho kutjira kupiterera hayendhendi muyithimwetwedha yokaye kokahe. Kutunda payineghedha yendi yothitetu, Wilma gha thighukire kukwagho kuTennessee oku gha mu roghitherire nguvurushokuru thirika thomatambwero ghendi, yoyishi gha nongononine yitenda yawo kukona yi ka kare yomakutondovoro ghoparudhi. Yitokora yendi yo kupitakana kumbaraghana dhawo ya retitherire po rokutangerera kukwatakanya nomarughaneno pofotji mukatji kawanu homarudhi gho kukuthighathigha mudoropa dhiya.

Mukamadighana yu gha kuhatithere kumaneghedhero ghomashweneno makutondovoro ghoparudhi muñurumbara, kate ka tunditha po miragho dhi. Wilma ghana shaghekire kutjira mu1962 no kuyenda kushure dhoghuhongi omu gha ka wanine digiri wendi ghokutangerera pashure dhodhikuru dhaTennessee, oku gha ka wanine maghamweno ghomanyinga gho kukuhongitha. Kutunda po ghana tangire kurughana eshi muhongi nomudeghuri ghoyomushupu.

“Yikuyuva yange yo kukumitherera mo yiwana eyi ni di nayo yina ni retedhera yishamberera, kumyaghedha midariyo dhihatu dhongorondo mumutangu ghoOlympics. Ame na dimukire eshi noghofotji temba gho kukona kutumbura yinu yi, norofotji temba.” Mudyo thikuma kukwange mukurughana nawamuregheya no na kurupera mukunongonona no kuturitha po hanu hongandji owa sho ha kare hapitererithi wawayendhawo mumako gho kunyekerera no kupira ghughambero. “Ame na tawa eshi thinu thomudyo thikuma muyipara yange tho kurughana pofotji nawamuregheya. Eyi ne yoyirota yange yo kuturitha po makurando kupitera muyipepa yomushupu nomakuhongo ghawakakunyanda.

Ghundwakadhi waWilma wa retire thitetu kwawambuyama hayendhendi thikumenena po awa nga kutangaweranga nawo ha kuture mo. Yinu yi ya ningithire hambuyama hamwe, yira Florence Griffith Joyner, nawo ha ka kumithe mo yirota yawo. Munyima dhoyifa yendi mu1994, thingi thawo nga ha kondjeranga mukuna tapa fumwa kumavurukero ghendi. Pashadyarero mbunga dhomatotoero ghoyipepa dhawambuyama kuna wananga yitaghera yomatjokedhero (Wilma Rudolph Courage Awards) kwawambuyama awa hana kupitanga mumaghukukutu mu ka kumitha mo yipepa yawo.

Thitjwandjo thishaghuwa thaWilma kuthiwana pashadyarero mukatji kombaraghana dhawo, dhodina Clarkville. “Ghomunu mbadi ha nyathanga yirota nomangcamu ghoyihima yomupepo wamunu ghumwe. Twahe hanu ghofotji no twa kurikanya. Eyi gha kara nayo kehe yuno munu ghushwi wendi gha wana kwaShakendengere.”

(© Wikipedia.)

- 3 Tjange makuwero nomakutjakero ghaNatalie Du Toit naWilma Rudolph ghudhemenena kumaghukukutu noyikumithamo yawo muyitoyamingwa yiwadi yi. **[20]**
 - 4 Owe ne, yowe keho Wilma Rudolph no nga ghu punguranga mbapira dhoye dhoyihokoka yokehe diyuwa dhoyihokokera noyikuyuva yoye. Tjange keho mbapira dhoyihokoka yokehe diyuwa yi mbo dhira kuvurama (yomudyo) muyipara yoye.
- Yitjanga yoye yi kume kughure ghomañando **200 – 250**. **[20]**

BLANK PAGE

BLANK PAGE

